



Republika e Kosovës
Republika Kosova-Republic of Kosovo
Kuvendi - Skupština - Assembly

Legjislatura III
Sesioni pranveror

Seancë e jashtëzakonshme solemne e Kuvendit
P- 014
Prishtinë, më 9 prill 2008, në orën 10:00
Ndërtesa e Kuvendit, salla e seancave plenare.

PROCESVERBAL

NGA SEANCA E JASHTËZAKONSHME SOLEMNE E KUVENDIT TË
RRPUBLIKËS SË KOSOVËS, TË MBAJTUR MË
9 PRILL 2008

Seancën e kryesoi **Jakup Krasniqi**, Kryetar i Kuvendit, kurse i ndihmoi **Xhavit Haliti**, anëtar i Kryesisë.

Kryesuesi konstatoi se në seancë janë të pranishëm 103 deputetë dhe e deklaroi të hapur punën e saj.

Kryetari i informoi deputetët se Kryesia e Kuvendit, në konsultim me grupet parlamentare, me propozim të Kryeministrit dhe të Presidentit të Kosovës, ka thirrur seancën e jashtëzakonshme e solemne të Kuvendit me këtë

R e n d i t e:

1. Miratimi i Kushtetutës së Republikës së Kosovës

Kryetari hodhi në votim miratimin e rendit të ditës. Rezultati i votimit ishte, si vijon:

Për----- 103,
Kundër-----0,
Abstenime-----0.

Kryetari konstatoi se Kuvendi njëzëri miratoi rendin e ditës.

Në fillim të seancës, Kryetari i Kuvendit, **Jakup Krasniqi**, përshëndeti Presidentin, Kryeministrin, ministrat, deputetët, Përfaqësuesin e Zyrës Civile Ndërkombëtare, z. Feith, udhëheqësit e përfaqësive diplomatike në Prishtinë, prijësit fetarë, përfaqësuesit e arsimit, të Universitetit të Kosovës, kryetarë të komunave të Kosovës, anëtarët e Komisionit Kushtetues, mysafirët e tjerë të pranishmit në sallë, qytetarët e vendit dhe të gjithë ata që i përcjellin punimet e kësaj seance.

Në vazhdim, ai tha se ende pa kaluar dy muaj nga shpallja e pavarësisë, sërish jemi mbledhur në evenimentin historik të institucionalizimit të lirisë për t'i dhënë shtetit tonë ligjin themelor, Kushtetutën e Kosovës, si dokumentin më të rëndësishëm politik dhe juridik, i cili është ndërtuar mbi themelet e demokracisë kushtetuese moderne.

Demokracia jonë kushtetuese siguron qeverisjen e popullit nëpërmjet përfaqësuesve të tij të zgjedhur, përcakton qartë kompetencat institucionale dhe iu garanton të gjithë qytetarëve të Republikës, pa asnjë dallim, të drejtat themelore dhe barazinë para ligjit. Pjesë përbërëse të saj janë virtytet qytetarëve, të solidaritetit, të besimit, të tolerancës dhe të integritetit.

Gjithashtu, ai theksoi se duke miratuar Kushtetutën, ne po kurorëzojmë aspiratat dhe vullnetin e popullit të Kosovës për liri, demokraci dhe përparim. Miratimi i Kushtetutës me vullnetin e lirë, si përfaqësues të zgjedhur të popullit të Kosovës, përbën njëkohësisht edhe betimin solemn të nënshtrimit tonë ndaj saj.

Duke respektuar Kushtetutën dhe ligjin, Kosova do të dëshmojë përcaktimin e saj për demokracinë e vërtetë, do të promovojë institucionet e përgjegjshme, do ta shfaqë kulturën e saj civilizuese dhe do të jetë partner serioz ndërkombëtar.

Kryetari ftoi Presidenti i Republikës së Kosovës, ta marrë fjalën.

Presidenti i Republikës së Kosovës, **Fatmir Sejdiu**, pasi përshëndeti deputetët dhe të pranishmit tjerë, tha se në vazhden e zhvillimeve jashtëzakonisht të rëndësishme dhe historike për Kosovën pas shpalljes së pavarësisë dhe njohjes ndërkombëtare të saj nga një numër i madh vendesh të botës demokratike, dita e sotme, po kështu, shënon një moment të veçantë në përmbylljen e ciklit të shtetndërtimit të Kosovës.

Në vazhdim, presidenti theksoi se Kushtetuta, me peshën e vet të veçantë, mund të quhet me të drejtë përmbyllje e procesit shtetndërtues të Kosovës. Kushtetuta e Republikës së Kosovës ka dy dimensione të rëndësishme që e përcjellin gjithë strukturën e saj të brendshme duke u shtruar si gërshet i suksesshëm i parimeve më të rëndësishme të ndërtimit të kushtetutave bashkëkohëse, por edhe si vëmendje e posaçme kushtuar pozitës së individit dhe të qytetarit të Republikës së Kosovës mbi bazë të standardeve më të larta ndërkombëtare.

Komisioni Kushtetues, në këtë Projekt-Kushtetutë ka arritur që suksesshëm të bëjë inkorporimin e zotimeve themelore që institucionet e Kosovës, pra ky Kuvend, si sovran i popullit, kanë vënë në relacion me dokumentin më të rëndësishëm të procesit ndërkombëtar për statusin e Kosovës, Propozimin gjithëpërfshirës të Presidentit Ahtisari.

Garancitë e dhëna për pozitën e komuniteteve pakicë shprehin, po kështu, qëndrimin e qartë të institucioneve të Kosovës për zbatimin e tyre në jetën praktike si pjesë e dëshmisë dhe e përkushtimit të qytetarëve të shumicës, por edhe të vetë institucioneve për ndërtimin e Kosovës si shtet sovran dhe të pavarur, si atdhe i të gjithë qytetarëve, pa dallim etnie.

Kushtetuta e Republikës së Kosovës, bashkë me ligjet që do të derivohen nga kjo Kushtetutë, do të jetë garanci kryesore e ndërtimit të Kosovës si shtet i mirëqenies ekonomike.

Duke pasur parasysh ndërtimin e gjithë strukturës institucionale përgjegjëse për zbatimin e tyre, Republika e Kosovës do të kapërcejë më shpejt edhe rrugën drejt integritetit të saj në Bashkimin Evropian dhe në NATO.

Në vazhdim, Presidenti shprehu konsideratat më të larta për punën e suksesshme që ka bërë Komisioni Kushtetues.

Ai, gjithashtu, shprehu falënderimet dhe mirënjohjen për mbështetjen e ekspertëve ndërkombëtarë nga Shtetet e Bashkuara të Amerikës, Zyra Civile Ndërkombëtare dhe të gjitha shtetet mike të Kosovës, në hartimin e Kushtetutës.

Kryetari ftoi Kryeministrin e Republikës së Kosovës, ta marrë fjalën.

Kryeministri i Republikës së Kosovës, **Hashim Thaçi**, tha se Kuvendi i Kosovës më 17 shkurt 2008 e shpalli Kosovën shtet të pavarur, sovran dhe demokratik, të cilin e njohën shtetet më të fuqishme dhe demokratike të botës.

Republika e Kosovës është shoqëri shumetnike, e përbërë nga shqiptarët dhe komunitetet tjera. Vlerat fundamentale dhe liritë e të gjitha kombeve demokratike janë të mbrojtura me anë të Kushtetutës.

Kushtetuta e Republikës së Kosovës është vullneti ynë, është legjitimiteti dhe vula e shtetit të Kosovës.

Duke e miratuar këtë Kushtetutë, ne vendosim për të drejtat e qytetarëve tanë dhe përgjegjësitë e qeverisë sonë, të cilat janë themele të zhvillimit të vendit tonë.

Kushtetuta ju mundëson qytetarëve tanë trajtim të barabartë përpara ligjit. Ajo i mbron të drejtat, detyrimet dhe liritë e gjithë shtetasve, pavarësisht nga përkatësia etnike, religjioni apo bindjet politike.

Llogaridhënia dhe përgjegjësitë, qeverisja e kufizuar, ndarja e kompetencave - janë disa nga elementet fundamentale të sistemit kushtetues, të cilat garantojnë se asnjë nga fushat e qeverisjes, si e vetme, nuk mund të sigurojë ruajtjen e të drejtave tona.

Në Kushtetutë pushtetet janë të ndara dhe të balancuara, për të siguruar një sistem funksional dhe stabil.

Në rrugën tonë për liri, drejtësi dhe demokraci, ne kurrë nuk kemi qenë të vetmuar. Përkrahje vazhdimisht kemi pasur dhe do t'i kemi miqtë tanë ndërkombëtarë, të cilët mbështesin fuqishëm dëshirën dhe vullnetin tonë për t'i mbrojtur dhe avancuar vlerat e përbashkëta të qytetërimit.

Kushtetuta e Republikës së Kosovës ofron edhe më tepër Kosovën me NATO-n dhe Bashkimin Evropian.

Në fund të fjalës së tij, **Kryeministri** i ftoi deputetët ta miratojnë Kushtetutën e Republikës së Kosovës.

Kryetari ftoi kryetarin e Komisionit Kushtetues të paraqet arsyetimin e Projektkushtetutës së Republikës së Kosovës para deputetëve të Kuvendit.

Kryetari i Komisionit Kushtetues, **Hajredin Kuçi**, tha se Komisioni Kushtetutës i Republikës së Kosovës, gjatë punës së tij ka çmuar rrugëtimin e popullit tonë, me plotë sakrifica dhe tragjedi, por edhe krenari gjatë shekullit që shkoi. Ka çmuar të gjithë ata që kishin për synim lirinë, pavarësinë, barazinë, demokracinë, Republikën dhe Kushtetutën dhe që ranë në altarin e lirisë.

Në vazhdim, kryetari i Komisionit prezantoi para deputetëve të Kuvendit përmbajtjen e Kushtetutës së Republikës së Kosovës, të radhitur në 14 kapituj dhe 162 nene.

Kushtetuta fuqizon Republikën e Kosovës si shtet të pavarur, sovran, demokratik, unik dhe të pandashëm.

Republika e Kosovës është ndërtuar mbi bazën e konceptit të barazisë qytetare dhe e definuar si shoqëri shumë etnike, e përbërë nga shqiptarët dhe komunitetet e tjera.

Kosova është definuar Republikë demokratike, e bazuar në parimin e ndarjes së pushtetit dhe të kontrollit të baraspeshës ndërmjet tyre.
Me këtë Kushtetutë kemi institucionalizuar pushtetin, por edhe kemi bërë kufizimin e tij.

Republika e Kosovës do të jetë shtet laik dhe neutral në çështjet e besimeve fetare.

Republika e Kosovës, si subjekt ndërkombëtar, ka mundësi të bëjë marrëveshje ndërkombëtare dhe të anëtarësohet në mekanizma ndërkombëtarë.

Të drejtat dhe liritë themelore të njeriut janë një kapitull i rëndësishëm i kësaj Kushtetute, ku garantohet respektimi, mbrojtja dhe përmbushja nga ana e shtetit të Kosovës, sipas standardeve më të larta ndërkombëtare.

Një kapitull i veçantë janë të drejtat e komuniteteve, duke i përcaktuar parimet e këtyre të drejtave, përgjegjësitë e shtetit për garantimin e tyre.

Sistemi i drejtësisë garantohet me këtë Kushtetutë. Pushteti gjyqësor është unik, i pavarur, i drejtë, i paanshëm, apolitik dhe siguron qasje të barabartë në gjykata për të gjithë.

Një institucion i ri dhe i pavarur është Gjykata Kushtetuese, si autoritet përfundimtar në Republikën e Kosovës për interpretimin e Kushtetutës dhe përputhshmërisë së ligjeve me Kushtetutën.

Kushtetuta garanton ekonominë e lirë të tregut, konkurrencën e lirë dhe siguron pronën private dhe publike, siguron të drejtat ligjore të barabarta për të gjithë investitorët dhe ndërmarrjet vendore dhe të jashtme.

Përdorimi i pasurisë dhe i burimeve natyrore garantohen me Kushtetutë.

Qeverisja lokale garantohet si nivel i pushtetit, që bazohet në qeverisje të mirë, transparencë, efikasitet dhe efektivitet në ofrimin e shërbimeve publike.

Kushtetuta garanton institucionet e sigurisë, të cilat do të kenë kontroll civil dhe demokratik. Forca e Sigurisë së Kosovës është forcë kombëtare e sigurisë së Republikës së Kosovës.

Republika e Kosovës do të ketë edhe Këshillin e Sigurisë Nacionale, si institucion që përgatit strategjinë e sigurisë së Republikës sonë.

Kushtetuta garanton funksionimin e Policisë profesionale, të Agjencisë për Inteligjencë dhe të Autoritetit Civil të Aviacionit.

Institucionet e pavarura, si Avokati i Popullit, Auditori i Përgjithshëm, Komisioni Qendror Zgjedhor, Banka Qendrore, Komisioni i Pavarur i Mediave, si dhe institucionet e krijuara nga Kuvendi, me të cilat garantohet pavarësia nga çdo organ apo autoritet tjetër në Republikën e Kosovës – janë disa prej institucioneve të pavarura.

Kushtetuta ka dispozitat përfundimtare, që japin pasqyrën e interpretimit dhe të amendamentimit të saj.

Kushtetuta e Republikës së Kosovës hynë në fuqi më 15 qershor të këtij viti, që nënkupton se me hyrjen në fuqi, të gjitha institucionet ekzistuese të Kosovës marrin kompetenca të plota në përputhje me këtë Kushtetutë.

Në fund, Kryetari i Kuvendit ftoi deputetët që me votim të deklarohen për Propozimin e Kushtetutës së Republikës së Kosovës.

Deputetët e pranishëm në sallë u ngritën në këmbë dhe duartrokitën në shenjë miratimi të Kushtetutës.

Kryetari konstatoi se Kuvendi, me aklamacion të 107 deputetëve miratoi Kushtetutën e Republikës së Kosovës.

Kryesuesi e deklaroi të mbyllur seancën në orën 10:45 minuta.

Kryetari i Kuvendit
Jakup KRASNIQI

Përgatiti:

Divizioni i Çështjeve Plenare dhe Procedurale